

01 小姐佢鱸鰻

顧怡君

『迪士尼』的 bāng-gà 是自細漢陪伴我大漢上重要的記持，我相信遮的故事到今猶原是逐家心目中的傳奇。「小姐佢鱸鰻」嘛是其中一个趣味的故事。女主角——「小姐」是一隻好額人飼的狗仔，自細漢就予人惜命命，無煩無惱敢若金枝玉葉。有一工，「小姐」的主人無細膩予伊走出去外口，就按呢伊煞予人當做是野狗共關起來。好佳哉予男主角——「鱸鰻」看著，伊原本就是佇街仔路四界溜的野狗，跤手健丟閣猛掠，趕緊共「小姐」救出來。落尾「小姐」的主人「惜花連盆，疼囡連孫」，就共「鱸鰻」嘛做伙羔轉來厝裡養飼，「小姐」佢「鱸鰻」就按呢逐工幸福快樂過日子。我感覺阿母佢阿爸的姻緣若親像是另外一款「小姐佢鱸鰻」的故事。

阿母猶未嫁翁進前會使講是千金小姐，因為外公佇鬧熱的街市開一間皮鞋店咧經銷「中國強」的布鞋。佇五、六十冬前，這號牌子的鞋仔就敢若是這馬上時行的運動鞋全款。阿母高商出業了後，就踮外公身軀邊共伊鬥扞生理。阿爸厝裡的環境就無阿母婦兜遐爾好額，阿公咧賣礦油，儉腸凹肚晟養六个囡仔，阿爸高中畢業雖罔有考牢私立大學，

毋過生食都無夠矣，哪有通曝乾？後來伊就決定去食頭路，鬥趁錢予小弟小妹讀冊。

後來有媒人介紹阿爸佢阿母熟似，兩個月了後婦就結婚矣。人講：「媒人保入房，無保一世人」，確實有影。無佻久，阿爸的龜跤就趕出來矣。飄撇的阿爸定定愛陪人客交際應酬，所以行酒家袂輸咧行灶跤全款。半暝仔淋甲醉茫茫，規身軀粉味倒轉來，攏是真四常的代誌。按呢無打緊，阿爸閣興拍麻雀，筊若是跋落去，就毋知影民國幾年矣？阿母定定共阮姊妹仔講：「耷耷翁食袂空，嫁著嬌翁艱苦一世人，佻後擺日暘定著愛擊較金咧。」

雖罔阿母佢阿爸少年的時，不時咧冤家量債，毋過阿爸食老已經無遐爾鵠越矣，婦兩個感情嘛愈來愈好。「小姐佢鱸鰻」的故事到今猶未煞，佇阮兜猶閣繼續咧搬。

02 說多謝

黃文俊

這幾冬來因為工課的關係，不時有機會去南北二路出張，逐禮拜攏愛坐公車去高鐵站，無形中有真濟機會去觀察公車內百百款的人。

自從智慧型手機仔愈來愈普遍了後，無論是佇公車、捷運，抑是火車、高鐵頂懸，上捷看著的就是「向頭族」。毋管是老歲仔、中年婦女、少年人，甚至是學生囡仔，大大細細攏咧 手機仔。猶有一寡雖然無咧 手機仔的人，嘛全款用手机咧聽音樂。這是一個眾人的身軀存在佇全一個空間，但是靈魂煞活佇家己的世界上好的證明。

坐公車的機會愈來愈濟了後，我會去觀察司機駛車的風格。公車司機是一個壓力真大的職業，欲佇這種高壓力的環境生存落來，每一個人攏有家己的一套生活哲學。

捌看過一個中年司機，咧欲到站的時，伊就會講：「某乜站到矣，落車愛細膩。」到站的時閣會好禮仔共人客講：「感謝恁來坐某乜號的公車。」拄開始我心內想講：「敢是婦公司咧選拔優良駕駛？所以司機才會遮爾好禮！」毋過，經過幾若個月，伊猶原遐爾好禮咧佮人客相借問，證明伊毋是為著獎勵，才咧佮人相借問。我發現：因為伊對人客較

有禮貌，人客佇咧上車、落車的時，共伊說多謝的嘛特別濟！我想：這就是咱臺灣人所講的「互相」。你對人好禮，別人嘛對你客氣，敢毋是咧？

閣捌看著一個少年司機，看起來三十插歲，逐工攏穿甲真擎紮，駛車完全無少年人彼種衝碰的感覺。路況好的時陣，伊猶原老神在在，袂講油門踏盡磅，予人坐公車坐甲心肝鼓撲撲倘。若拄著大空車的時，有的司機早就共喇叭擲甲 pann-pan 叫，伊煞拍空速、踏絞擋，輕聲細說咧哼歌，度過無聊的空車時間。這個少年司機予我看著無簡單的人生修養！

是講，坐公車遐濟擺，敢毋捌拄著服務態度無好的司機？我的經驗是按呢：咱若佇咧落車抑是到站的時，大聲共遮的辛苦的司機講一聲：「多謝！勞力！」婦面容的線條就會加真軟略呢！

03 生日針

陳明芳

古早，若是目睷開始略略仔紅紅腫腫，我就愛開始煩惱敢是欲生日針矣？身體小可仔各樣是無打緊，要緊的是我這張比蠅蚩的翼閣較薄的面皮。這個煩惱的起源是阿媽的一句話：「你是偷看啥人洗身軀？」阿媽講，會生日針就是因為去偷看人洗身軀，抑是偷看人換衫。猶毋過，我斟酌共想幾若遍，我都毋捌按呢做啊！無，敢會是彼擺去看著阿兄仔草埔邊咧放尿？

閣較見笑的是，隔轉工去學校，我掩掩揜揜，猶是去予同學影著。掃的目色若針、目色若火，我規身軀連鞭砧、連鞭燒，袂輸家已是通緝犯，四界咧走路。連繼幾若工，我綿爛照阿媽教的撇步，正蕊目睷生日針愛用倒手伸對後擴，對後壁面擗去正蕊目睷的目尾，共目睷皮繃繃咧，聽講按呢會較緊好。囂俳無落魄的久，總算有一工，去予我拄著當初彼个對我指指揜揜的同學嘛生日針矣。僥倖喔！伊的倒蕊目睷腫甲若李仔咧！到底是偷看過佻濟人洗身軀？

三十幾年後的今仔日，阮查某团倒蕊目睷降降，我恁伊去眼科，先生隨講是生日針，毋過繼落來煞問阮查某团敢是偷看人洗身軀？想袂到，這種嚇驚囡仔的步數這馬猶聽

會著！當然，伊是鴨仔聽雷，戇戇仔笑，顛倒是我予先生的這句話恁轉去細漢時，彼段予序大人半滾笑半相騙的過去。我尾仔才知影，這種講法是一種序大人掠機會教囡仔的智慧，主要是欲教示囡仔愛有規矩。雖然生日針恰看人洗身軀真正是無底代，猶毋過，囡仔人確實拄著人咧洗身軀，抑是去便所，或者是換衫的時，攏會主動閃邊仔去，莫去共人偷看。

轉到厝了後，阮查某团問講哪會生日針？雄雄，我頭殼內浮出誠濟答案：「若是一个人性地傷稔、勢揀食、愛哭、跤手慢鈍……就會足捷生日針的。你若是生日針，人就知影你的做人矣！」伊是一个惜面皮的囡仔，相信伊後擺會較有站節！啊若我，心肝內想講：「無法度……阮阿媽講，飼一个囡仔毋知愛講佻濟白賊咧！」

04 食甲飽的餐廳

林宜男

現此時外口經濟無好，生理歹做，所以真濟人想欲做生理，第一个想著的就是做食的，所以造成滿街仔路攏是賣食的的現象，當然競爭嘛真激烈！

相準逐家攏愛「大碗閣滿壩」的心理，有的頭家就想出用「食甲飽」的步數來吸引人客。幾十項好食的料理：生的、熟的、甜的、鹹的；有魚、有肉、青菜、海產、果子，甚至也有咖啡、汽水、雞卵糕恰冰淇淋，應有盡有，想欲食啥就食啥，予你食甲飽為止。請人客的主人也毋免煩惱點的菜會合人客的口味袂。雖然這款餐廳的價數有較懸，但是恰意的人嘛是真濟。

有一站仔我恰真濟人全款，若有機會去食甲飽的餐廳，攏想欲食予夠本。欲去的前一頓，攏是清彩食爾爾，留腹肚欲去遐食一頓仔粗飽。看著遐濟項物件，逐項攏足好食款，攏想欲食看覓，結果煞食傷濟。定定攏飽甲愛共皮帶啟開，甚至會飽甲腹肚痛，愛庸起來行行咧。有時陣中晝食傷飽，暗頓就無食。按呢早頓清彩食，中晝食傷濟，暗時閣無食。若不時這款食法，毋但較會大箍，這款一頓飽，一頓枵的食法，身體會袂堪得，所以這陣我罕得閣去這種餐廳。

另外，為著欲食予夠本，有一寡仔人無考慮家己的食量，物件下性命提，尤其是較貴的魚、肉、蝦仔、蟳仔恰海產，排甲規桌頂，食袂去的就清彩烏白擲，抑是全部攏摒落去潘桶內底，尻川拌拌咧就做伊去，無尊重其他人客食的權利。予餐廳頭家的支出增加，共浪費的成本算佇其他善良人客的身上，真無負責任。佇這馬注重環保、愛護地球以及尊重性命的年代，這款自私自利的行為，實在是真樞才。

食甲飽的餐廳原本的用意是提供各種的食材，予每一个人按照家己的食量，食佻濟算佻濟，嘛會使食著平常時罕得食的物件。咱要緊家己的權益，嘛愛尊重別人的權利，莫浪費食材，因為別人全款嘛是付錢消費的人客。上重要的是，毋通為著貪食共身體拍歹去，才袂「貪食無補，落屎艱苦」！

05 老牛欲出嫁

張照權

這一日，雲林縣元長鄉鹿南村規庄頭鬧熱滾滾，因為是老牛欲出嫁的好日子。

天拄拍陪光，規庄大細攏總起床矣，欲替老牛辦一場奢颯的婚禮。查埔人共大門搭做五彩的圓拱門，查某人掌紅圓、做紅龜粿、鼠麴粿，閣準備一牛車的嫁粧，有幼麵麵的牧草，清甜的紅菜頭恰番薯簽，向望嫁過去就會當平安順序。

老牛的主人存叔仔佇三十外年前，對彰化北斗買著這隻牛，共伊號做「老牛」。存叔仔足疼惜老牛，特別搭一間牛牢予伊躑。熱天定定噴水替老牛沖身軀，驚蠓仔共叮，閣共晾蠓罩，伊一直將老牛當做是親人咧看待。

檣頭當無閒的時，老牛綴存叔仔起冬落冬，犁田、拖車、駛石礮、挨塗礮，伊攏是恬恬仔骨力咧做，無半句怨言。看著稻仔好收成，老牛替存叔仔歡喜。若拄著做大水抑是烤旱，老牛嘛親像有淡薄仔毋甘，予人足感心的。

日子一工一工過，存叔仔已經八十一歲，袂得通閣牽老牛去田裡作穡矣。有牛販仔出八萬箍欲共老牛牽去剖，聽著人欲來買老牛，存叔仔煩惱甲袂食袂暍得。伊想講：「老

牛綴我一世人，閣較濟錢嘛免數想，我袂使予老牛變做牛肉乾。」

存叔仔就四界去探聽，看有老牛安養的所在無？天公疼贖人，有雲林縣政府農業處的鬥走從，西螺農工學校嘛答應欲照顧老牛到老，予存叔仔較放心淡薄仔。

這一日，西螺農工派一台大禮車欲來娶老牛，存叔仔一面替老牛濃身軀，一面吩咐老牛：「無你做伴，我會孤單。毋過你做你去免煩惱，新厝比遮較四序，有囡仔恰你做伴，共你照顧，閣有闊莽莽的草埔仔通予你行踏，我嘛會定定去看你……。」存叔仔那交代那流目屎。老牛嘛親像了解主人的心意，目眶紅紅掠存叔仔金金看。

逐家當咧共老牛送上禮車的時陣，老牛跛步煞停落來，雄雄放一埕「人情屎」，留予存叔仔做紀念，現場的人攏足感動。人牛情深，這是一場珍貴閣感動的婚禮。